

In Páadé'in Ta'nin John Ita'nannin

John ita'do' i to'wí In Tuu kin nakháwä'íví'gedi

¹ I to'wí hăn'oe ts'anpáadébo nayí'íví'gedi naadi wâyta'do', i-á in Tuu kin nakháwä, hedá in wówátsi napäyi'i-ân namuu. Haa i natú'in git'oe, hedá na'inbí'piyá nakeepóedí na'inbí tséedíbo-á âypimû', hedá na'inbí mandidá âytäge.

² Nă'i nawówátsipäyi'i' nakeepóe ihaydi âymû', hedá haa íví'gedi na'in giháhpóe'i-á wé'ge'in t'owa âyt'ôe'o'. Nă'i in wówátsi nahándepí'in napäyi'íví'gedi wâytumáa, i-á Yôesi Tádá-ádi na'ăn, hedá na'inbí'piyá ipikeeyan. ³ Haa âymû'in hedá haa íví'wedí git'oe'indá un wá' wâytumáa, hedânho un wá' ûhanginpúwídí, hedá undádí na'indádí na'inbí wówátsi wé'ge âyhûuwídí. Hedí ta'gendi Yôesi Tádá-ádi hedá íví ay Jesus Christ-ádi na'inbí wówátsi âyhon. ⁴ Hedího nă'i hăäwí í'gedi unbí'piye' wâyta'do' hedânho un wá' t'ăhki híhchan bînmá've-ídí.

Yôesi Tádá-ádi gimuudá há'to ívít'aywó'kanhûuwí

⁵ Nă'i hí' năa wâytukankhâymáa'i-á Yôesi Tádáví ay Jesus Christ-ví'wedí git'oe'i namuu. Yôesi Tádá-á wí kohthay waagi'ba namuu, hedá wáygé wânbo wí'ûnkhûunáhpí. ⁶ Yôesi Tádá-ádi na'inbí wówátsi âyhondi gitúdáho', hewânbo wa' t'aywó'di í'gebo gimándáho', ívíwânpihōeyó'o', hedí khuu eedí waagibá giyidi in ta'gen namuu'indá wí'âyhonpí.

⁷ Hewänbo nakohthayná' ni'ge Yôesi Tádá na'än diwe giyidáho', undádí na'indádí na'inbí wówátsi wé'ge gínmuu, hedá iví ay Jesus-ví ûnp'oe ich'áa'idá dí'owídidi na'inbí t'aywó'di t'ähkí dînyâa'o'.

⁸ Na'in wên t'aywó'nin wänbo wí'ây máapí gin gitúdáho wí'bo ívípihòeyó'o', hedá na'inbí pí'ná khó'yé-á in ta'gendá wí'ây máapí. ⁹ Hewänbo Yôesi Tádá ví'piye' ívít'aywó'dihäätsi'andáho', idá na'inbí t'aywó'di gínmuu'i dîn'owóyé-í, hedí i yä'dâapíkan íví'andi' dînyâa'amí, gá iví tuu imägi waa i'odân, hedá i-á híwó'da'ba i'o'. ¹⁰ Yôesi Tádá ho natú na'in t'owa t'ähkí ívít'aywó'do', hedího wáymûu wänbo wí'íví't'aywó'nanpí gin gitúdáho', kindidá Yôesi Tádá ihòeyó'an waagibá gitú', hedá iví hí' na'inbí pí'ná khó'yé wí'ây máapí.

2

¹ Navi áyyää, ná'i hääwí i'gedí wâyta'do hedânho wí'úví't'aywó'nâamípídí. Hewänbo wí to'wí it'aywó'nandáho', wí to'wí ûn'än Yôesi Tádá ví páadèpiye' igí' i'aywondaa'amídí, i-á Jesus Christ i t'ähkí híwó'di namuu. ² Hedí i-ân iví wówátsi imägi na'inbí t'aywó'di dîn'owóyé-ídí, hewänbo na'inbí'da'ba yoe, t'ähkí t'owaví t'aywó'di dínmuudân.

Yôesi Tádá âytaadá iví tsontuu ây'a'ginnamí

³ Hândidan gínhanginnání ta'gendi Yôesi Tádá âytaa'in? Gá iví tsontuu ûnmuu'i'ây'a'gindodân. ⁴ Wí to'wí Yôesi Tádá ôetaa gin natúdí hewänbo iví tsontuu wí'ôn'a'gindopídá, i-áho wí hòeyó'i namuu, hedá in ta'gen namuu'in iví pí'ná khó'yé wí'imáapí. ⁵ Hewänbo to'wídí Yôesi

Tádáví tųų ûnmuu'i' ô'n'a'gindodá ta'gendi pín ta'ge hayđi óeséegí, hedí kindidân gínhanginná i-ádí gimuu'in. ⁶ Hewänbo to'wên ditû'nin Yôesi Tádá-ádí dimuu'in, indá dínkhây'ă' inbí wówátsi dâyhûuwí'in Christ iví wówátsi iho' waagibá.

⁷ Un wâyséegí'in, nă'in tsontųų natû'nin ívíséegíhûuwí i'gedi wâyta'do'in ts'aamin wínamuupí, indá in páadédíbo bínmaa'in namuu, i hí' ho ít'oe'ibá namuu. ⁸ Hewänbo nă'in tsontųų năá wíyá wâyta'dodi ts'aamin waagi'inbá namuu, gá ây'a'gindodáho i khuų nakhanmăn waagibá gínpo'dân, hedá i kodí'di ko namuu'i-áho nakeepo'. Ta'gendi Christ nă'in tsontųų-á i'a'ginnan, hedá un wá' bín'a'gindo'.

⁹ Wí to'wí nakohthayná' ní'ge iví wówátsi ihon gin natúđi, hewänbo iví tí'ûu páadé'i ít'aydá, i-á wa'di khuų i'gebo nayi'. ¹⁰ To'wên nă'in tí'ûuwín páadé'in dâyséegí'in, indáho nakoná' ní'ge diyí', hedího inbí pí'nă kó'yé hăăbo in ta'ge'in p'ôe iwedi ovâyhânge'amí'i' wíđâymáapí. ¹¹ Hewänbo wí to'wí iví tí'ûu páadé'i' ít'aydá khuų iwebo na'ăn. I-á khuų i'ge nayíđi wí'ûnhanginnáhpí wépiye' namännin, gá wí tsí't'aa'i waagibá ûnkhuųnândân.

Háa in wé'ge'in t'owa Yôesi dâytaapí'in inbí wówátsi dâyhon waa in t'owa i dâyséegí'in wíđínkhây'ăhpí ovâyhí'amí'in

¹² Naví áyyăă, naadi wâyta'do gá Christ i'annin namuudi unbí t'aywó'di ûnmuu'i wovây'owóyéđân. ¹³ Un tádá'indá, naadi wâyta'do' gá i to hăn'oe ts'anpáadébo nayi'i' bín'taadân. Un e'núndá, wâyta'do' gá i Penísendi ho bín'tandân.

14 Un áyyää ímuu'in, wâyta'nan gá Yôesi Tádá bîntaadân. Un tádá'indá, naadi wâyta'nan gá i to hân'oe ts'anpáadebo nayi'i' bîntaadân. Un e'núnda, wâyta'nan gá undá íkaydân, hedá unbí pí'nă khó'yé-á Yôesi Tádáví hí'-á kay'indidá bînmáa, hedá handidá i Penísendi-á ho bînt'an.

15 Wíwovâyhi'amípi unbí wówátsi bînhûuwídí háa in t'owa Yôesi Tádá dâytaapi'in inbí wówátsi dâyhon waagibá, hedá i yă'dâapi' hăäwí indá ovâyhi'andi-á wíwovâyhi'amípi. Wí to'wí nă'i híwó'pí' namuu'i' óehí'andáho Yôesi Tádá pín ta'ge haydi wí'óeséegípi. 16 Kinnân in Yôesi Tádá dâytaapi'in díví'o': Haa inbí túu'ú iwe diwănpichaa waagi kaygi'di díví'ami'in dida', hedá hăäwí t'ăhki dâymû'i-á wá' kaygi'di-á dida', hedá inbí hăäwí shánki híwó'di dínmuu waagi dichaađi dívíyêngi'o'. In Yôesi Tádá dâytaapi'innânho ha'wăa díví'o', hewânbo kí'bi tsiyekandá Yôesiví'wedí wína'ăhpi. 17 Haa nă'in Yôesi Tádá dâytaapi'in díví'o' waa dínkhangít'óe, hedá t'ăhki nă'i híwó'pí' hăäwí kaygi'di dida'i-á wá' nakhangít'óe. Hewânbo to'wên háa Yôesi Tádá natsonpo' waa díví'o'indá hânhay wânbo t'ăhki diwówayêení.

Christ-ví hănbí ho na'ă'

18 Naví áyyää, năäho i t'ă'gi thaa tso'wa na'ă'. Wovâytu'anho Christ-ví hănbí na'ă', hedi năäbo báyéki kí'min dikeepo'. Kin napo'di gínhanginná năäho i t'ă'gi thaa tso'wa naná'nin. 19 Nă'in t'owadá ta'gendi na'inbí'năpiye'in wídimuupídí na'in díyoe'an. Na'inbí'năpiye'in dimuudáho', na'indáđíbo dívíwóyí'níwân. Hewânbo indá na'in

díyoe'an dihaydi nakeepóe wí' wänbo in diwedí na'inbí'näpiye' wínamuupí'in.

²⁰ Hewänbo undá in waagi'in wí'ímuupí. I to'wí shánkí híwó'di namuu'idi i Yä'dâa'i P'oewaahâa wovâymägi, hedího un t'ähkí in ta'gen namuu'in únhanginná. ²¹ Naadi ná'in ta'nin wâyta'do gá in ta'gen namuu'in únhanginnândân, únhanginnáhpídá yoe, hedá wá' únhanginná wí to'wí in ta'gen natû'di-á wí'ihôeyó'opí'in. ²² To-an wí hôeyó'i namuu? Gá wí to'wí natû'di-ân Jesus-á wínamuupí'in i to'wí Yôesi Tádádí óesóge'i' t'owa ovây'aywoenídí. Wí to'wí ha'wâagi'i namuu'idá wí'gíndíbo Yôesi i Tádá-ádí hedá iví ay-ádí ovânyoegi'o', hedího Christ-ví hânbi' namuu. ²³ Wí to'wí natúdí Jesus-á Yôesi Tádáví ay wí'ûnmuupí'in, i-á Yôesi Tádá wänbo iví pí'nä khó'yé wí'imáapí. Hewänbo wí to'wí natúdí Jesus-á Yôesi Tádáví ay ûnmuu'indá Yôesi Tádá wá' iví pí'nä khó'yé imáa.

²⁴ Hewänbo undá hääwí páadé úvits'anwhäyu ihaydibo' ít'oe'i' únkây'ä' unbí pí'nä khó'yé bînmá've-í'in. Han úví'odáho Yôesi Tádá-ádí hedá iví ay-ádí wé'ge ímúní. ²⁵ Hedí Yôesi Tádáví ay-á iví tûu imägi in wówátsi nahándepí'in na'in dípägít'óe'in.

²⁶ Wáy wên t'owa dida' in ta'gen namuu iwedi wovâyâa'amí'in, hedânkun ná'in ta'nin wâyta'do'. ²⁷ Hewänbo Yôesi Tádádí i Yä'dâa'i P'oewaahâa wovâymägi, hedá unbí pí'nä khó'yébo bînmáa, hedího wí'úntáypí wíyá to'wídí Yôesiví'gedí wovâyhá'amídí, gá i Yä'dâa'i P'oewaahâadá hääwí t'ähkí wovâyhá'odân, hedí

i hääwí wovâyhá'o'i-á ta'gen namuu, wên hôeyó wänbo wínamuupí. Hediho únkhây'ä' Christ-ádi wé'ge ímúní'in, háa i Yä'dâa'i P'oewâahâadi wovâyhá'an waabá.

²⁸ Navi áyyää, háa otú waa Christ-ádi wé'ge únkhây'ä' ímúní'in, hedânho owáy i wíyá na-keepóe ihaydi wí'íkhuwôeda'ípídí, hedá wôeda'di iví'wedi wí'úvíkaakwomá've-ípí. ²⁹ Únhanginná Christ-ân híwó'da' i'o'in, hediho únhanginná wá' t'ähkí to'wên inbí wówátsi ta'ge dâyhonnindá Yôesi Tádáví'wedi di'áypuyä'in.

In Jesus-ví'piye' dívíwhäyunde'indá Yôesi Tádáví ây dimuu

3

¹ Bí'ánshaa'an Yôesi Tádáví na'in báyéki díséegí'in, hedi báyéki díséegídânkun iví ây kin dítu'o'. Hedi ta'gendi iví ây-ânkun gimuu. Hediho in to'wên Yôesi Tádá dâytaapí'in dimuu'indá wídínhanginnáhpí háawin gimuu'in, háawi i namuu wänbo wídínhanginnáhpídí. ² Un wâyséegí'in, tobá nää Yôesi Tádáví ây gimuu wänbo', wa'di wínahanginnáhpí háawin gipuwagít'óe'in. Hewänbo nã'indá gínhanginná: Christ nawáy'ää ihaydá i waagi'inbá gipúwí, gá ta'gendi háawi i namuu waagi âymúníân. ³ To'wên t'ähkí nã'in napúwí'in pín ta'ge haydi dâysíkha'máa'indá yä'dâapíkan t'ähkí iwedi dívíyâa'o', háa Christ iwedi iyâa'an waagibá.

To'wên Yôesi Tádáví ây únmuu'in wídívít'aywó'kanhonpi

4 To'wên t'ähkí dívít'aywó'kanhonnindá Yôesi Tádáví tsontuü dâyyoegi'o', hedí iví tsontuü ônyoegi'andáho t'aywó'ninho namuu.
 5 Únhanginná Christ ho nää oepáa k'aydipiye' na'ää'in t'owa t'ähkíví t'aywó'dí ovâyyâa'amídí, hedí i-á wên t'aywó'nin wänbo wí'imáapí. 6 To'wí wänbo Christ-ádí nayí'i-á wí'it'aywó'kanhonpí, hewänbo wí to'wí it'aywó'kanhondi-á háawi Christ namuu'in ta'gendi wínaka'póya'pídá ta'gendi wí'óetaapí.

7 Naví áyyää, to'wên häädi waa in ta'ge'in p'ôe i'ge dimännindá'mân inbí wówátsi ta'ge dínmuu, Christ-ví wówátsi ûnmuu waagibá. Hedího wí'úvímäänípi to'wídí wänbo in ta'gen namuu iwedi wovâyyâa'amídí. 8 Penísendi páadé iwedibo' it'aywó'kanhon, hedího to'wên häädi waa dívít'aywó'kanhonnindá Penísendiví'in dimuu. Hedí Penísendiví tsiyekan ônhánú-ídí-ânkun Yôesi Tádáví ay nää oepáa k'aydipiye' na'ää. 9 Wí to'wí ta'gendi Yôesi Tádáví'wedi na'aypuyä'i-á wí'it'aywó'kanhonpí, gá Yôesi Tádáví'wedi wówátsi ts'aamin iké'dân, hedího Yôesi Tádáví'wedi na'aypuyädi wí'ûnkoedipí häädi waa it'aywó'dikanhûuwídí. 10 To'wên inbí wówátsi ta'ge dâyhonpídí háa inbí tí'ûuwín páadé'in dâyséegípídí Yôesi Tádáví'in wídimuupí. Hedí kindidânho nahanginná wé'in t'owa Penísendiví ây ûnmuu'in hedá wé'in Yôesi Tádáví ây ûnmuu'indá.

Yôesi Tádáví ây ûnmuu'in dívíséegímáa

11 Nää'innân namuu in hí' it'oe'in páadé iwedibo': Gínkhây'ä' wí'nä táye ívíséegíhûuwí'in.

12 Wígínkhây'ähpí Cain waagi'inbá gimúní'in.

I-á i Penísendivî? ûnmuu, hedânkun iví tí'ûu ihay. Hedî háadan Cain-di óehay? Gá iví tí'ûu-á iyä?dâakanhondân, hewänbo i-á híwó'píḍa? i'o'.

¹³ Hedîho tí'ûuwin páadé'in, in Yôesi Tádá dâytaapí'indi wovâyt'aydáho?, wí'ítsika'yêenípí, "Háadan hêe dí'tay?" ¹⁴ Na'inbí tí'ûuwin páadé'in âyséegídího gínhanginná chu'in waagi'inbá gimú'de wänbo nää-á in wówátsi ts'aamin âymáa'in. Wí to'wí iséegímáapî'-á wa' chu'i waagi'bánamuu. ¹⁵ To'wên inbí tí'ûuwin páadé'in dínmuu'in dâyt'ayhonnindá t'owa t'akhanu'in waagi'inbá dimuu, hedî un únhanginná wí to'wí nat'owat'akhanut'óe'i-á in wówátsi nahádepí'in wí'imáapí'in. ¹⁶ Christ iví wówátsi na'in gimuudi imägi, hedânkunho gínhanginná háawin in kodî'nin séegi namuu'in. Hedîho na'in wá' gínkhây'ä? gikhâymuní'in na'inbí tí'ûuwin páadé'ingî'-á na'inbí wówátsi âymäänídí.

¹⁷ Wí to'wí híwó? hay hääwí iví wówátsi i'amígî? ûnkw'ôndá, hedî iví tí'ûu páadé'i hääwí ûntáydí imúndedî, hewänbo wa'di iví pí'nä khó'yé wínasehkanätaachanpo'pídí óekhäge'namídí, ti nã'i to'wí ta'gendî Yôesi Tádáví séegi iví pí'nä khó'yé imáa? Hedân yoe. ¹⁸ Naví áyyä, séegi i'gedî wí'íwänpidahí'má've-ípí, hewänbo híwó'di hääwí iví'odibo? âykeeyamí in ta'gennin séegi âymáa'in.

¹⁹⁻²⁰ Hedî in séegi âymáadáho gínhanginná in ta'gen namuu'in wá' âymáa'in, hedá häädi wänbo Yôesi Tádáví'piye? ívibée ihaydá áyîngipídibo na'inbí pí'nä khó'yé gichäa-í. Ma'di wáyyédí gichäa idi díthchänukhâymaa waagi, hewänbo

Yôesidá na'inbí shánkí hay'i namuudi na'inbí ánskaa ûnhanginná, hedího i-á ûnhanginná ná'in séegí âymáa'in, i-á háäwí t'ähkí ûnhanginná.

²¹ K'ema'in, Yôesidi wíđítuchänukhây máapí'in na'inbí pí'ná k'ó'yé gíchaädáho', iví'piye' ívibéedí há'to gikhuwôeda'í, ²² hedí háäwí namúni wänbo âydaa'andi-á âyhónde', gá iví tsontuü ây'a'gindodân hedá háa iví'o'indidá âyhíhchandodá. ²³ Hedí ná'innân iví tsontuü ûnmuu: Gínkhây'ä' iví ay Jesus Christ-ví'piye' ívíwhâyú-í'in, hedá idá díyôn waagibá wí'ná táye-á íviséegíhúuwí. ²⁴ To'wên Yôesi Táđáví tsontuü ôn'a'ginhonnindá i-áđí wé'ge dimuu, hedá i-á indáđíba namuu, hedí ná'in gínhanginná gá iví Yä'dâa'í P'oewaahâa dímgidân.

In to'wên ditû'nin i Yä'dâa'í P'oewaahâa dâymáa'indá bîntayi'ní

4

¹ Un wâyséegí'in, t'ähkí to'wên ditû'nin Yôesigí' dívíhée'o'in wí'úvíwhâyú-ípi. Páadé bîntayi'ní ûnhanginpúwíđí tigú ta'gendi Yôesiví P'oewaahâa dâymáa'in, gá báyéki dihôeyó'in wáyyé t'ähkí dikw'ôndân, indá Yôesi Táđáví tukhe'min dimuu gin ditû'. ² Wâytukankhây máa háđíđí ûnhanginnání'in háa Yôesiví P'oewaahâa dâymáa'in háa yoe: To'wên t'ähkí t'owaví páadépiye' ditû'nin Jesus Christ i nat'owapaa'iví'piye' dívíwhâyunde'indáho Yôesiví P'oewaahâa dâymáa. ³ Hewänbo to'wên t'ähkí Jesus-ví'gedí han wíđívíhí'máapí'indá Yôesiví P'oewaahâa

wídâymaapí. In to'wên kî'min dimuu'in Christ-ví hânmin waagi'inbá dimuu. Ho wovâytu'an nă'in kî'min dikă'ăăgít'óe'in, hedî năă wéngé t'ăhki dîyiho'.

⁴ Naví áyyăă, undá Yôesi Tádáví'in ímuu, hedî to'wên hôeyódí ditû'nin Yôesi Tádáví tukhe'min dimuu'indá bînt'anho', gá i Yă'dâa'i P'oewaahhâ unbí pí'nă khó'yé bînmáadân hedî i-á shánki nakay i Penísendiví'wedî, nă'i Penísendi-á in Yôesi Tádá dâytaapí'inbí pí'nă khó'yé dâymáa. ⁵ Nă'in hôeyó'in dimuu'indá Yôesi Tádá dâytaapí'indă' dimuu, hedânho in wé'ge'in Yôesi Tádá dâytaapí'in dimuu'in waagibá dívíhee'o', hedá in t'owa dâyt'óyande'indá Yôesi Tádá dâytaapí'in wá' dimuu. ⁶ Hewânbo na'indá Yôesi Tádáví'in gimuu, hediho in to'wên i dâytaa'indi na'in dînt'óyande', hewânbo in to'wên iví'in dimuupí'indá wídînt'óyandepí. Handidân gínhanginná wé'in in ta'gen dívíhee'o'in dimuu'in hedá wé'in in hôeyóđă' dívíhee'o'in dimuu'indá.

Yôesi Tádá iví ây ûnmuu'in iséegí, hedânho indá wá' dínkhây'ă' wí'nă táye dívíséegíhûuwí'in

⁷ Un wâyséegí'in, wí'nă táye ívíséegíhûuwí, gá in séegí Yôesi Tádáví'wedî na'ădân, hedî to'wên t'ăhki in séegí dâymáa'indá Yôesi Tádáví'wedî dî'âypuyă, hedá Yôesi Tádá-á dâytaa. ⁸ Yôesi Tádá-á naséegít'óe'i namuu, hediho to'wên dâyséegíhonpí'indá Yôesi Tádá wídâytaapí. ⁹ Kinnân Yôesi Tádádí dînkeeyan díséegí'in: I-á iví wí' ayđă' ûn'ăndi' isan năă oepáa k'aydipiye' hedânho in kodî'nin wówátsi díməänídí. ¹⁰ Kindidân gínhanginná háawin in séegí namuu'in: Tobá

na'indi Yôesi Tádá wí'âyséegípi wänbo', idá na'in díséegídí iví ay nää oepáa k'aydipiye' isan iví wówátsi imäänídí na'inbí t'aywó'di gínmuu'i dín'owóyé-ídí.

11 Un wâyséegí'in, ha'wâagidi Yôesi Tádádí na'in díséegídânho na'in wá' gínkhây'ä' wí'nä táye ívíséegíhûuwí'in. 12 To'wídí wänbo hânhay wänbo Yôesi Tádá wí'óemû'pí, hewänbo wí'nä táye ívíséegídá i-á na'indádí namuu, hedá iví séegí idi dímä'i-á na'inbí pí'nä khó'yé gínsômä'.

13 Kindidân gínhanginná Yôesi Tádá-ádí wé'ge gimuu'in hedá i-á na'indádá: Idi iví Yä'dâa'i P'oewaahâa dímägi. 14 Hedá wá' âymû' iví ay isannin t'ähkí t'owaví aywondi dínmúnídí, hediho i'gedi t'owa t'ähkí âyt'ôe'o'. 15 T'ähkí to'wên in t'owaví páadépiye' ditû'nin Jesus-á Yôesi Tádávi ay namuu'in, Yôesi Tádá indádí namuu hedá indá i-ádá. 16 Hediho gihâhpoe hedá ívíwhâyunde Yôesi Tádádí díséegí'in. I-ân naséegít'ôe, hedi to'wên in séegí dâyhonnindá Yôesi Tádá-ádí dimuu hedá i-á indádá. 17 Hedi owáy ihay thaa t'owa háa híwó' háa híwó'pí díví'annin ovâykeekw'ódi ihaydi, in séegí na'inbí pí'nä khó'yé ho gínsôedá wíghikhuwôeda'ípí, gá wa' nää oepáa k'aydi giyidibo Christ waagi'ba gipóedân. 18 Yôesi Tádá âyséegídáho wí'âykhuwôeda'ípí, hedi ta'gendi pín ta'ge haydi i âyséegídí na'inbí khuwôeda' gínyâapo'. Hewänbo âykhuwôeda'dáho ta'gendi pín ta'ge haydi wí'âyséegípi, hediho tuchänu i'gedi íví'ânshaa'o'.

19 Yôesi Tádádí páadébo na'in díséegí, hedânkun in séegí âymáa. 20 Wí to'wí natúdí, "Naadi

Yôesi Tádá dóséegí,” hewänbo iví tí'ûu páadé'i' it'aydáho', wí hôeyó'i namuu. Iví tí'ûu páadé'i' imúnde'i' iséegípídí, há'to Yôesi Tádá óemúndepî' wänbo-á óeséegí-í. ²¹ Hedi ná'in in tsontu Christ-di dímägi'in namuu: To'wên Yôesi Tádá dâyséegí'indá dínkhây'ä' inbí tí'ûuwin páadé'in wá' dâyséegíhûwí'in.

5

¹ Jesus-á i to'wí namuu Yôesi Tádádí óesóge'i' t'owa ovây'aywoenídí. To'wên ná'in dívíwhâyunde'indá Yôesi Tádáví'wedi ho wíyá di'âypuyä, hedi to'wên i Tádá dâyséegí'indá, iví ây wá' dâyséegí. ² Yôesi Tádá âyséegídá hedá iví tsontu ây'a'gindodá, handidânho gínhanginná iví ây wá' âyséegí'in. ³ Hediho iví tsontu ây'a'ginhondi âykeeyo ta'gendi i âyséegí'in. Iví tsontu-á wâhphade wí'ûnkháapí ây'a'ginnamídí, ⁴ gá to'wên t'âhkí Yôesi Tádáví'wedi wíyá di'âypuyä'indá dínkoedidân i yä'dâapî' nää oepáa k'aydiwi namuu'i dâyt'aanídí. Hedi na'inbí whâyü gínmuu'idânho git'anpo'.

Yôesi Tádádí iví ay Jesus-ví'gedi dítu'an

⁵ To'wí iwhâyundedi Jesus-á Yôesi Tádáví ay namuu'in, idá'mânho i nää oepáa k'aydiwi yä'dâapî' namuu'i' óet'ande'.

⁶⁻⁸ Jesus Christ-ân nää oepáa k'aydipiye' na'ää'i' namuu, hedi p'oedi óep'ó'p'oe'an hedá iví ûnp'oe-á ich'áa. Na'ää iví ûnp'oe ich'âanídí, p'oedi óep'ó'p'oe'amídída'ba yoe. I Yä'dâa'i P'oewaahâadân dítu'o ná'in ta'gen namuu'in, i-á ta'ge natukanyidi. Hediho ná'in poeyedi

wéhpêe tuuda' dâymáa: I Yä'dâa'i P'oewaahâa-á i p'oe-á hedá i ûnp'oe-á. Hedi indidá Jesus Christ-ví'gedi na'in díhangin'ando'. ⁹ Háa t'owadi dítu'o waa ívíwhâyunde', hewänbo háa Yôesi Tádádí dítu'o waa shánkí gínkhây'ä' ívíwhâyü-i'in, iví hí'-á shánkí ûnchä'muudi, hedi idânho iví ay Jesus-ví'gedi dítu'o'. ¹⁰ To'wên Yôesi Tádáví ayví'piye' dívíwhâyunde'indá inbí pí'nä khó'yé dínhanginná háa Yôesi Tádá natú waa ta'gen namuu'in. Hewänbo to'wên Yôesi Tádáví hí' wí'ônwhâyundepí'indá wí hôeyó'i waagibá óepa', háa idi iví ayví'gedi dítu'annin wídívíwhâyundepídí. ¹¹ Hedi kinnân Yôesi Tádádí na'in dítumáa: In wówátsi nahánde'innânho dímggi, hedi iví ay áytaadiho kí'min wówátsi âymáa. ¹² To'wên Yôesi Tádáví ay Jesus inbí pí'nä khó'yé dín'annindáho kí'min wówátsi dâymáa. Hewänbo to'wên Yôesi Tádáví ay inbí pí'nä khó'yé wídín'änpí'indáho kí'min wówátsi-á wídâymáapí.

Yôesi Tádádí wówátsi nahánde'ín dímggi

¹³ Naadi un Yôesi Tádáví ayví'piye' úvíwhâyunde'in ná'i t'ähkí wâyta'do' hedânho ta'gendi únhanginnánídí in wówátsi nahánde'ín ho bînmáa'in. ¹⁴ Hedi häädi Yôesi Tádáví'piye' ívíbéedí ívíyûusu'amídí, háa nada' waagi'i hääwí gida'po'di, ta'gendi gínhanginná Yôesi Tádádí dînt'óyande'in. ¹⁵ Hedi hääwí gida'po'di dînt'óyande'in gínhanginnândi, gínhanginnân wá' hääwí áydaa'andi' ho dímggi'in.

¹⁶ Wí to'wí iví méesatewi tí'ûu páadé'i' it'aywó'dodi imû'di, hewänbo in t'aywó'nin i'o'indá hä'min wínamuupídí in wówátsi

nahándepe'í in diwedi óeyâa'ámídí, ná'i to'wí kǐ'min t'aywó'nin i'andigí? Yôesiví'piye' ônyûusu'ámí, hediho in wówátsi óemääní. Hewänbo wên t'aywó'nin nayi', indá in wówátsi nahándepe'í in diwedi wovâyâa'ámí'in namuu, hedi naa wó'tû'pí wí to'wí ha'min t'aywó'nin i'andi bînyûusu'ámí'in. ¹⁷ T'ähkíyâ'dâapí tsiyekan ívî'o'i-á t'aywó'dida' namuu, hewänbo wên t'aywó'nin nayi' ha'min wínamuupí in t'owa in wówátsi nahándepe'í in diwedi ovâyâa'ámí'in.

¹⁸ Gínhanginná to'wên Yôesi Táđáví'wedi di'âypuyä'indá häädi wänbo wíđívít'aywó'kanhonpí'in, gá Yôesi Táđáví ay Jesus-di ovây'âyînmáadân, hediho i Penísendi wí'ûnkoedipí ovây'hónídí. ¹⁹ Gínhanginná na'indá Yôesi Táđáví'in gimuu'in, hewänbo to'wên t'ähkí in Yôesi Táđá dâytaapí'in dimuu'indá i Penísendidi ovâytsomáa. ²⁰ Hedá wá' gínhanginná Yôesi Táđáví ay náä oepáa k'aydipiye' na'ää'in, hedi idi ka'powa dímägi hedânho i ta'gendi Yôesi namuu'i âytâa-ídí. Hediho ná'i ta'gendi Yôesi namuu'i-ádí wé'ge ívíhon, íví ay Jesus Christ-ádá wé'ge gimuudi. I-ân i ta'gendi Yôesi namuu, hedi ibá in wówátsi nahándepe'í in napäyi'i namuu.

²¹ Navi áyyää, i hääwí in t'owa inbí yôesi dínmuu waa dâychaámáa'íví'wedá bí'âyîngi'an.

Naʼinbí Sedó Yôesiví Tʉʉ / Nanbí Sedó Jôesiví Tun

New Testament in Tewa (USA) (San Juan/Santa Clara)

copyright © 2012 Wycliffe Bible Translators, Inc.

Language: Tewa

Translation by: Wycliffe Bible Translators

Contributor: Wycliffe Bible Translators, Inc.

Naʼinbí Sedó Yôesiví Tʉʉ (San Juan)/ Nanbí Sedó Jôesiví Tun (Santa Clara)

Copyright Information

© 2012, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tewa (USA)

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files dated 29 Jan 2022

f775bf1b-8c8a-5c5e-9288-3b9b00387997